

金樓子序

先生曰余於天下為不賤焉竊念臧文仲既歿其立言於世曹子桓云立德著書可以不朽杜元凱言德者非所企及立言或可庶幾故戶牖懸刀筆而有述作之志矣常笑淮南之假手每嗤不韋之託人由是年在志學躬自搜纂以為一家之言粵以凡庸早賜茅社祚土瀟湘寥帷陝服早攝神州晚居外相文案盈前書帙未輟俾夜作晝勤亦至矣其間屢事元言亟登講肆外陳玉鉉之文內宏金疊之典從乎華陰之市廢乎昌言之說其事一也六戒多務千乘糾紛夕望湯池觀仰月之勢朝瞻美氣眺非烟之色替於筆削其事二也復有西園秋月岸幘舉柅左海春朝連章螭翰雖有欣乎寸錦而久棄於尺璧其事三也而體多羸病心氣頻動卧治終日睢陽得善政之聲足不跨鞍聊城有卻兵之術吾不解一也常貴無為每嗤有侍聞齋寂寞對林泉而握談柄虛宇遼曠玩魚鳥而拂叢著愛靜之心彰乎此矣而候騎交馳仍麾白羽之扇兵車未息還控蒼兕之軍此吾不解二也有三廢學二不解而著書不息何哉若非隱淪之愚谷是謂高陽之狂生者也竊重管夷吾之雅談諸葛孔明之宏論足以言人世足以陳政術竊慕焉老生有言知我者希則我者貴矣有是哉有是哉裴幾原劉嗣芳蕭光侯張簡憲余之知己也伯牙之琴嗟綠綺之長廢巨卿之驥驅白馬其安歸昔為俎豆之人今成介冑之士智小謀大功名其安在哉蓋以金樓子為文也氣不遂文文常使氣材不值運必欲師心霞間得語莫非撫臆松石能言必解其趣風雲元感儻獲見知今纂開闢已來至于耳目所接即以

先生為號名曰金樓子蓋士安之元晏稚川之抱朴者焉

興王

箴戒

后妃

終制

戒子

聚書

二南五霸

說蕃

立言上

立言下

著書

捷對

志怪

雜記上

雜記下

自序

至正三年癸未歲春二月望日葉森書於西湖書院大學明新齋

重編金樓子篇目

第一卷

興王篇一

箴戒篇二

第二卷

后妃篇三

終制篇四

戒子篇五

聚書篇六

二南五霸七

第三卷

說蕃篇八

第四卷

立言篇九上

立言篇九下

第五卷

著書篇十

捷對篇十一

志怪篇十二

第六卷

雜記篇十三上

雜記篇十三下

自序篇十四

金樓子篇目

金樓子卷第一

梁孝元皇帝撰

興王篇一

粵若稽古天皇氏地皇氏人皇氏分有十紀一曰九頭二曰五龍三曰拈提案春秋元命包作攝提博雅又作提

提四曰合雒案博雅作雄五曰連通六曰序命七曰脩飛案春秋元命包作脩蜚八曰因穆案春秋元命包作提九曰禪

通十曰疏訖案春秋元命包作訖容成氏大庭氏柏皇氏中央氏栗陸氏驪連氏赫蘇氏宗盧氏祝和氏

渾沌氏昊英氏有巢氏朱襄氏葛天氏陰康氏無懷氏

太昊帝庖犧氏風姓也母曰華胥燧人之世有大跡出雷澤華胥履之生庖犧蛇身人首有聖

德燧人氏沒庖犧氏代之繼天而王首案首原本作者今依帝王世紀校改德於木為百王之先都陳至于共工

霸而不王

炎帝神農氏姜姓也母曰女登為少典妃遊華陽有神龍感女登生炎帝人身牛首有聖德以

火承木都陳遷魯嘉禾生醴泉出在位百二十年

黃帝有熊氏號軒轅亦曰帝鴻少典之子姬姓也又姓公孫少典娶有嬌女附寶見大電光繞

北斗樞星照郊野附寶孕二十月生黃帝龍顏有聖德生而神靈弱而能言幼而循案史記作循齊長而敦敏成而聰明受國於有熊居軒轅之丘迺與炎帝戰於阪泉之野三戰然後得

行其志屈軼草生庭倭人入則指之又景星麟鳳之瑞乃以風后配上台天老配中台五聖

配下台。謂之三公置左右大監以治人。得寶鼎。興封禪。帝坐於元扈之上。太一來下。有大螭如羊。帝曰。土氣勝。故以土德王。在位一百年。有四妃。生二十五子。

少昊金天氏。一號窮桑。一曰白帝朱宣。帝黃帝之子。姬姓。母曰女節。黃帝時有大星如虹。下流華渚。意感生少昊於窮桑。是為元囂。姓姬氏。或云己氏。降居江水。以登帝位。以金承土。都曲阜。

有鳳鳥之瑞。以鳥紀官。鳳鳥氏以為司曆正。元鳥氏為司分。伯趙氏為司至。青鳥氏為司開。丹鳥氏為司閉。祝鳩氏為司徒。案左傳鳩氏為司空。案左傳鳩氏為司空也。此疑有脫誤。爽鳩氏為司寇。

鵲鳩氏為司事。五雉為五工正。九扈為九農正。天下大治焉。

帝顓頊高陽氏黃帝之孫。昌意之子。母曰女樞。金天氏之末。瑤光之星。貫日如虹。感女樞於幽房之宮。案別卷中右脅有九色毛。生顓頊。以水承金。始都窮桑。徙商丘。

帝嚳高辛氏少昊之孫。蟠極之子。生而神靈。自言其名曰依。案原本脫曰字今多斷齒以木承火。都亳。在位十年。元妃有邠氏女曰姜嫄。生后稷。次妃有娥氏女曰簡翟。案世本生契。次陳鄴。案大戴禮記作陳隆又案此今戴記本與字生民禮弓疏引大戴作鍾氏女曰慶都。生堯次陬。陬。案大戴禮記陬作氏女曰常儀。生

子摯。摯立不善。乃立堯。

帝堯字放勳。一名同成。育陶唐氏。帝嚳之子。伊祁姓也。母曰慶都。為嚳妃。出觀河渚。遇赤龍而孕。寄伊長孺家產。甲申歲而生。堯丹陵也。堯眉八采。日角方目。足有元武之字。手有三河之文。

豐下鏡上。就之如日。望之如雲。黃收。案收原本記作收純衣彤車白馬。冬則鹿裘。夏則絺葛。采

稼不踰土階三等。克明俊德。以親九族。九族既睦。平章百姓。百姓昭明。協和萬邦。焦僥氏來獻
沒羽。常年之人得神獸若羊。名曰獬豸。堯乃緝其皮以為帳。分命羲仲。羲叔和仲。叔。日中星
鳥。以殷仲春。日永星火。以定仲夏。宵中星虛。以正仲秋。日短星昴。以正仲冬。時許耳之子名曰
由。字道開。一字武仲。仲武黃白色。長八尺九寸。兄弟七人。十九而隱。堯欲禪之。由乃洗耳。是後
景星耀於天。甘露降於地。朱草生於圃。鳳凰止於庭。有翼箭。案說文翼作楚。述異記箭作箭。英
之瑞。都於平陽。命羲仲。羲叔和仲。叔。掌四方。在位四十一年。洪水滔天。懷山襄陵。四岳舉
治水。九年績庸不成。五十年。乃更咨四岳得舜。乃在璿璣玉衡。以齊七政。類於上帝。禋於六宗。
望於山川。辨案古字辨編通升羣瑞案舜典堯崩乃葬濟陰城陽廟居齊郡有柏樹死而更生焉舜攝
政二十八年。堯乃殂。三年禮畢。舜避丹朱於南河。諸侯朝覲訟獄者。不之丹朱而之舜。舜曰。乃
天命也。初堯教丹朱暴。以文柔為居。屏象為子。

帝舜有虞氏。龍顏大口。圖天日角。出額重鼻。足履龜文。目重瞳子。身長九尺一寸。常夢擊天鼓。

母曰握登。早終。瞽叟更娶生象。象傲。瞽叟頑。後母嚚。咸欲殺舜。使舜入井。舜繫井傍行二十里。

以孝聞。三十而帝堯問可用者。四岳咸舉舜。堯於是降以女娥皇女瑩。案列女傳作英配之妻舜以觀

其內。使九男與處。以觀其外。二女不敢以貴驕。事舜親戚甚有婦道。堯九男皆益篤。舜耕於歷

山。歷山之人皆讓畔。耕地得金枝銀節。漁於雷澤。雷澤上人皆讓居。陶於河濱。河濱器皆不苦

窳。一年而所居成聚。二年成邑。三年成都。堯乃試舜五典。百官皆治。布五教於四方。堯乃老使

舜攝行天子政。巡狩得舉用事。卿雲出。景星見。西王母使使。乘白鹿。駕羽車。建紫旗。來獻白環之玦。益地之圖。乘黃之駟。綏耳貫胸之氏。來獻珠蝦。既陟帝位。以土承火。都平陽。命禹為司空。棄為后稷。契為司徒。咎繇為士。垂為共工。益為朕虞。伯夷為秩宗。夔為典樂。龍為納言。庶績咸熙。羣瑞畢集。簫韶九成。鳳凰來儀。擊石拊石。百獸率舞。生子商均不肖。舜復禪禹。入九疑山。置銅劍一枚化為磔。今濟南歷城有祠。太陽山有虞氏三石闕也。禹即位後十五年。舜乃殂。禹讓商均。避之陽城。天下不歸商均。而之禹。初商均一名章鵠。

帝禹夏后氏。名曰文命。字高密。母修己。山行見流星貫昴。意感。又吞神珠薏苡。胸坼而生禹於

石紐。夜有神光。長於隴西大夏縣龍角珠庭。虎鼻大口。兩耳參鏤。案淮南子作漏。別卷又作鏤。首戴鈞鈴。身

長九尺九寸。胸有黑子如玉斗焉。手長至膝。脰無毛。左手中十七黑子。為人敏給克勤。其德不

違。其言可信。聲為律。身為度。乃遂與益后稷奉帝。令諸侯百姓。案史記作奉帝。命諸侯百姓。傷先人父繇之

功。不成受誅。乃勞身焦思。過門不入。而洪水平。既陟元后。以金承土。都平陽。或營安邑。薄衣食

而致孝於鬼神。卑宮室而致美於黻冕。陸行乘車。水行乘舟。泥行乘橈。山行乘櫟。神鹿出於河

水。天錫元圭。乾吾國獻裘。毛有五采。復薦咎繇於天。將以致禪。會咎繇終。復薦益。禹殂。葬會稽

廟中有鐵櫨鐵莢石船。廟裏有塗山神姑之像。珠璣為帳。寶玉瑤華。諸廟莫及。當中山水之盛。

良辰吉日。羅綺袷服。滿橋梁之上。皆金翠為飾。神又甚靈。彼人所敬。初禹娶塗山氏之女生啟。

三年喪畢。益避啟。人不歸益而歸啟。一名建。一名余母化而為石。啟即位。伐有扈氏。啟庶兄也。

夏禹氏絕少康出於竇之中復禹跡也

成湯姓子名履字天乙狼星之精感黑龍而生高天廣角陰準手有縱理如印綬之文豐下兌上哲而有鬚長九尺四寸八肘凡有七號一名姓生二云履長三云膺肚四云天成五云天乙六云地甲七云成湯成湯始居亳從先王居作商諸湯征諸侯葛伯不祀湯始伐之湯曰汝不能敬命予大伐殛之無有攸赦作湯征伊尹號阿衡阿衡欲干湯而無由乃為有莘氏媵臣負鼎俎以滋味說湯致於王道湯謂之曰自進非道也乃令還其本居使人聘迎之五反然後從之任以國政白狼銜劍有神人身虎首獻玉鏡白狼九尾諸國貢玉盤入自北門遇女房作女房之歌案書序作遇女鵲女房林樹久不花一旦生如鳳翼湯出見野張網四面祝曰自上下四方皆入吾網湯曰噫盡之矣乃去其三面祝之曰欲左左欲右右不用命乃入吾網諸侯聞之曰湯德至矣及於禽獸當是時夏桀為虐政淫荒而諸侯昆吾氏為亂湯乃興師率諸侯伐桀敗於有娥氏之墟葬於鳴條之野乃改正朔服色朝諸侯崩葬於濟陰亳縣東北郭去縣三里冢高七尺漢哀帝時遣大司空行湯冢又說曰殷湯無葬處此言非焉武丁大戊竝賢君也

周文王昌狼星之精母曰大任夢長人感己有胎目不視惡色耳不聽淫聲以胎教之洩於豕牢生文王龍顏虎眉身長十尺胸有四乳即位為西伯有雀生鸛於殷城隅文王增脩政三年四方諸侯皆服崇侯諧之於紂紂不納費仲又言於紂欲誅之紂不從九年春三月率六州諸侯朝於殷崇侯虎又諧之紂怒囚文王於羑里雖有憂患方脩先聖之業廣解六十四卦著其

卦詞謂為周易時謂西伯為聖紂疑而未達長子伯邑考質於殷為紂御紂烹之為羹賜文王以試之實聖當不食子羹文王得而食焉紂笑曰誰謂西伯聖者食其子而尚不知紂謂西伯曰譖汝者長鼻決耳也文王曰此崇侯虎之狀紂赦文王四十三年春正月庚子朔文王在鄴九州諸侯咸朝五緯聚房心周之分野時有鳥銜丹書集於周社文王乃獻洛西赤壤之國方十里請除炮烙之刑紂許焉賜以弓矢鉞鉞使專征天下大悅有鳳凰銜書而至文王稽首受命是歲即位化被江漢之域以受命之始年也

周武王發望羊高視斷齒生而有光太公周公作輔武王渡河伐紂中流白魚躍入舟長一尺四寸一說云丹鯉未知孰是武王俯取以祭既渡有大至於王屋流為鳥其色赤其聲魄云是時諸侯不期而會盟津者八百諸侯皆曰紂可伐也武王曰未可乃還歸居二年聞紂昏亂暴虐滋甚殺王子比干囚箕子太師疵少師彊抱其樂器而奔周戊午師渡盟津諸侯咸會共

案古

文共恭通

行天罰甲子昧爽武王朝至於商郊牧野乃誓武王左仗黃鉞右秉白旄紂聞武王來亦發兵七十萬人距武王紂師雖衆皆無戰心心欲武王亟入及紂師皆倒兵以戰以開武王武

王馳之持太白旗以麾諸侯畢拜武王乃揖諸侯諸侯畢從武王至商國商百姓待於郊於是天錫黃鳥之旗遂入至紂死所武王身射之三發而後下車以輕劍擊之以黃鉞斬紂頭懸之大白之旗肅胥氏獻石磐柅矢苦庭之國獻文犀馳命釋百姓之囚表商容之間命南宮括散鹿臺之財發鉅橋之粟以賑貧弱時夷雍之子名伯夷叔齊不食周粟餓於首陽依廩虎以

為羣。叔齊起害鹿。鹿死。伯夷志之而死。

漢高祖劉季。父名執嘉。母曰含始。入池中浴。見玉雞銜赤珠。名曰玉英。吞之有孕。昔孔子夢三槐間。豐沛邦有赤蛇。化為黃玉。上有文曰卯金刀字。此其瑞矣。帝美髯髯。隆準。容受直言。好謀多欲。平秦楚之難。撥亂反正。雖不脩文學。而性明達聰。自監門戍卒。見之如舊。初從民心。作三章之約。天下既定。命蕭何次律令。韓信申軍法。張敖定章程。叔孫通定禮儀。陸賈造新語。又與功臣剖符作誓。丹書鐵券。金匱石室。藏之宗廟。雖日不暇給。規模宏遠矣。

漢太宗恒即位。宮室苑囿。車騎服御。無所增益。有不便輒弛。以利民。嘗欲作露臺。臺基已成。將構召匠計之。直百金。乃曰。百金中人十家之產也。吾奉先帝宮室。嘗恐羞之。何以臺為。身衣弋綈。所幸慎夫人。衣不曳地。幃帳無文繡。常集上書囊。以為殿帷。兵器無刃。以示敦朴。為天下先。葬霸陵。皆瓦屋。不以金銀銅鐵為飾。因山不起墳。南粵尉佗自立為帝。召佗兄弟以德懷之。佗遂稱臣。與匈奴結和親。而背約入盜。令邊備守。不發兵深入。恐煩百姓。吳王濞詐病不朝。賜以几杖。羣臣哀菴等諫說雖切。常假借納用焉。張武等受賂金錢。覺更加賞賜。以愧其心。專務以德化民。是以海內殷富。興於禮義。斷獄數百。幾致刑措。至於中宗宣帝。樞機周密。品式備具。工巧器械。先代莫及。民畏其法。吏奉其職矣。

漢世祖文叔。建平元年十二月甲子夜。生於武帝故宮。有赤光照室。影如五麟七鳳。後望氣蘇伯阿為王莽使。至南陽。遙見春陵城郭。曰佳哉。美氣鬱鬱。慈惠。帝美鬚眉。身長八尺七寸。腳下

有文色如銀印厚一分更始起兵還春陵遠望舍內火光赫然屬天夢乘赤龍登天上珠階玉闥乃以三千人破王莽百萬衆及即位故能平隗囂公孫述等在兵既久厭武事嘗思息肩皇太子嘗問攻戰之事帝諭曰衛靈公問陳於孔子孔子不對非爾所及也每旦視事日昃乃罷斷遠方餉異味奇珍功臣高枕無所誅殺引公卿講論經理夜分乃寢太子諫曰陛下有禹湯之明失彭聃之福願頤愛精神帝曰我自樂之不為疲也雖身濟大業兢兢如不及故能明慎政體總覽權綱嘗有獻千里馬者帝曰鑾旗在前屬車在後朕乘此安之乃以駕鼓車初巡狩春陵父老曰乞蠲十年帝曰天下艱難三年已外豈能自保乃蠲三年退勳臣進文吏身衣大練色無重采耳不聽鄭衛之音手不持珠玉之扇宮房無私愛左右無偏恩損池籞廢文櫟賜州國竝皆一札十行細書成文勤約之風行於上下嘗著瑞火籠賦內外匪懈百姓寬息戢弓矢散馬牛信止戈為武也

魏武帝曹操用師大較依孫吳之法而因事設奇量敵制勝變化如神自著兵書十餘萬言諸將征伐皆以新書從事臨時以手為節度從令者克捷違教者負敗與虜對陣意思安閒如不欲戰然及至決機乘利氣勢盈溢故每戰必克取張遼徐晃於亡虜之中皆佐命立功列為名將其餘拔出細微登為牧守者不可勝數是以創造大業文武竝施御事三十餘年手不捨書晝則講軍策夜則思經傳登高必賦被之管絃皆成樂章才力絕人手射飛鳥躬擒猛獸嘗於南皮一日射雉六十三頭及造宮室繕治器械無不為之法則皆盡其意雅性節儉不好華麗

攻城拔邑得靡麗之物則悉以賜有功勳勞宜賞不吝千金無功望施分毫不與四方所獻與羣下共之豫自製送終衣服四篋而已

晉世祖安世少厲高行造次必於仁恕未曾有過言失色於人然而明達善謀能斷大事暨登大阼之日制強國御下有禮所以鎮壓內外輯靜四方威惠參洽文武必舉故天下服焉承魏氏奢侈剝弊之後百姓思古之遺風帝既謙儉寡慾亦雅識時變臨朝愷悌務崇簡泰有人餉雉頭裘者即令燒之朝廷輯睦興居可觀故威服強吳規模宏遠雖饗國未久德洽於民矣其俊惠懷喪亂中宗東渡所謂五馬俱渡江一馬化為龍者也

宋高祖德興清簡寡慾嚴整有法度未嘗視珠玉與馬之飾後庭無紉綺絲竹之音寧州嘗獻琥珀枕光色甚麗時諸將北征以琥珀治金瘡帝大悅命搗分賜諸將平關中得姚興從女有盛寵以廢事謝晦諫即時遣出財帛皆在外府內無私藏宋臺建有司奏東西堂施局腳牀銀塗釘帝不許使用直腳牀釘用鐵諸主出適遣送不過二十萬無錦繡金玉內外奉禁莫不節儉後孝武帝大明中壞帝所居陰室於其處起玉燭殿與羣臣觀之牀頭有土障壁上挂葛燈籠廣州所部二千石有獻入筒細布一端八丈帝既見惡其精麗勞民力即付所司彈牧守以布還之并制嶺南勿作此布帝素有熱疾并患金瘡末年尤劇坐卧常須冷物而未能得後人獻石牀帝見善之寢其上即覺極以為佳乃歎曰木牀猶用功不少況乃鑄石即還其人亦令毀之帝始遊軍彭城置酒命紙筆賦詩曰先蕩臨淄寇卻清河洛塵華陽有逸驥桃林無伏輪

於是羣才竝作也。

宋太祖義隆年十四身長七尺五寸好讀史書善楷隸能文章温和有人君之德及南面負宸深以子民為先臺殿堂宇無所改易為吏長子孫居官成姓號明法令時人謂有建安永平之風每至諸侯王宴集必先論國家政務自朝訖晡迺設食既而語人曰千乘之君幼居人貴吾所以未便設食令此輩稍知饑寒也經巡歷至上庫謂左右曰此庫內大有錢珠可羨願左右曰此縣官之物耳何羨願耶帝曰此皆國家之物吾奉先帝之祀常懼羞之四方豐稔倉粟皆紅省租賦米五錢也

梁高祖武皇帝生而靈異有聖德頸光龍液舌文八字頂垂帶重丘額照日象有文在手曰武帝并上諱三字始在髫髻便愛琴書容止進退自然合禮常與兒童鬪技手無所持躡空而立觀者擊節咸共稱神及遭獻太后憂哭踊大至居喪之哀高柴不能過也每讀孝子傳未嘗終軸輒輟書悲慟由是家門愛重不使垂堂登於晚年探蹟索隱窮理盡性究覽墳籍神悟知機讀書不待溫故一閱皆能誦憶所以馳騁古今備該內外辨解聯環論精堅白沛國劉歊當時馬鄭上每析疑義雅相推揖深沈靜默不雜交游所與往來一時才雋至於得人門稱多士居宇精肅常有煙霧垂簾掛帳望者竦然六義四始尤解禮體登高必賦莫非警策弱冠升朝令問藉甚太尉王儉齊國阿衡欽上風雅請為戶曹屬司徒竟陵王齊室驃騎招納士林待上賓友之禮范雲時為司徒記室深慕上德自結神遊驅車到門頃日驟至上嘗旦往報雲雲聞街

衢灑掃喚呼清道。俄聞笳鼓之聲。雲意天子出幸南苑。尋乃上遣通馬。心獨怪之。未敢言也。上
哲於知人。慮無遺事。歷司徒法曹祭酒掾。會友輔仁之職。永明九年。出為鎮西諷議。西上。述職
行過牛渚。直暴風卒起。入泊龍濟。既波浪不可靜。登岸逍遙。四望梁山。瞻眺墟落。見一長老。披
儒服至。揖上曰。君龍顏虎步。相不可言。天下方亂。四海未一。安蒼生者。其在君乎。上笑之曰。觀
公長者。不容見戲。俄而風靜。此夕竟屈姑熟。永明十年。太祖登遐。上始承不豫。使即言歸。輕舟
仍發。州府贈遺。一無所受。齊隨郡王苦留一宿。不許得單舫望星上路。犯風冒浪。兼行不息。雖
狂飈地發。高浪天湧。船行平正。常若安流。舟中之人。皆稱神異。及舟漏臨沒。叫不輟聲。鵲頭戍
主周達奉上一船。再波就路。至京不踰二旬。自在途便不盥櫛。寢食俱廢。焦憂易形。視人不識。
望宅奉諱。氣絕良久。既葬。嘔血數升。水漿不入口者四日。憂服之內。不復嘗米。所資麤麥。日中
二溢。再拜山陵。杖而後起。涕淚所灑。松為變色。及號思廬室。未嘗見齒。仍留山陵。因欲隱遁。太
傅宣武王苦諫乃止。有桑門釋僧輝。不知從何來也。自云有許負之法。通名詣上。見而驚曰。檀
越項有伏龍。此非人臣之相。貧道所未見也。若封泰山。願能見覓。上笑而不荅。此後莫知所之。
齊明帝敕上為雍州領兵。往救新野。仍即發引。振旅長途。號令清嚴。所過秋毫不犯。信賞分明。
士卒咸思盡命。凡公私行旅。多停大雷。輒逾信次。不肖時發。上軍浦口。值風起浪生。汨流汨波。
無敢行者。軍直兵啓風浪大不可冒。宜入浦待靜。兼應解周何郎神。上曰。周公瑾何無忌。在昔
勤王。如我今日。亦復何異。爾若有靈。當令風靜。因打上鼓催進。行途未遠。便波恬風息。於是利

涉常乘便風漢河穀貴百姓多饑上賑救乏絕闔境不匱九月九日上出講武時士女觀者遠

近畢至中間忽暴風起烟塵四合當上所居獨白日清照有紫雲特起始齊高在府夢著履別

卷引此上太極殿三人從一人齊武一人齊明一人張天地圖而不識意言是太祖子弟及踐

陳嘗與太祖密謀案別卷引此作燕謂太祖曰我辛苦得天下而祚不傳孫我死龍子當得龍子齊龍

子死當屬阿度阿度齊明小名此後當還卿子孫遂至大霸及太傅援京邑夜在越城假寐忽夢見一

大人著朱衣牽三匹馬來太傅因騎一匹騰空半天而墜次衡陽王一馬踴過屋而落後上騎

一匹因化成龍遂飛上天此幽讚神明吉之先見及受終太祖允恭寶曆臺城內起至敬殿庶

羞百品若殷薦焉其中隋珠和璧圖淵方井倂於宗廟上晦朔恒號慟哽絕躬至寢門若文王

之為世子也又奉為太祖於鍾山起大愛敬寺又奉為獻后起大智度寺即位五十年至於安

上治民移風易俗度越終古無得而稱焉又作聯珠五十首以明孝道云伏尋我皇之為孝也

四運推移不以榮落遷貿五德更用不以貴賤革心臨朝端默過隙之思彌慙垂拱嚴廊風樹

之悲踰切齊潔宗廟虔事郊禋言未發而涕零容弗改而傷慟所謂終身之憂者是之謂也蓋

虞舜夏禹周文梁帝萬載之中四人而已

箴戒篇二

末喜桀之妃美於色薄於德亂孽無道女子行丈夫志身常帶劍桀嘗置末喜於膝上喜謂桀

曰羣臣盡憎妾之貴乃以益慢於君君威衰令多不從皆以妾為亂君願賜死桀於是大怒行

苛法賜與嬖妾侈益無度府藏空虛譽者昌諫者亡羣下杜口莫敢正言造酒池可以運舟一鼓而牛飲者三千人於酒池醉而溺死者無數於是求喜笑之以為樂

夏桀作為瑤臺瑤室象牙之席白玉之牀以處之

夏桀淫於婦人求四方美女積之後宮俳優侏儒狎徒能為奇瑋戲者聚之於傍造爛漫之樂夏桀嘗鑿霍山通於淵關

夏桀時兩日竝出黑光偏天攝提之星失其常所伊洛水竭天雨血月流精火神回祿見於黔隧

昔夏后既衰妖精竝見蜚鴻滿野夷羊在牧

殷帝乙無道為偶人謂之天神與之博令人為行天神不勝乃戮辱之

殷武乙無道嘗為革囊盛血仰而射之命曰射天獵於河渭之間暴震而死

殷帝紂四西伯美里西伯乃獻獸黃金毛如織錦玉女駭難犀九江大貝青狐元豹黃熊白虎因費仲獻紂紂喜之

殷帝紂淫虐王子比干諫弗聽剖其心十二穴破而觀之

帝紂垂胡長尺四寸手格猛獸愛妲己色重師涓聲狗馬奇物充牣後庭使男女裸形相隨為長夜之飲時人為之語曰車行酒騎行炙百二十日為一夜

帝紂時木林之地宵陷為池池生淫魚取而食之池一夜而竭得淫魚數百大悅之錫之宮人